

www.BibleForChildren.org

San Mateo 8



Ra saa kuu te ndiya'a uni kii, ra saa ndixiyo iin viko tanda'a ñuu Caná, ña ndikun ndiaa chi Galilea. Ra ndixaa tu si'í Jesús va nuu iyoo viko kan, ra kana tu na Jesús va ndixaa ra xi'in ndia ita'an xi'in ra nuu iyoo viko tanda'a kan.



Ra saa kuu ndia ndee ndia kan saa ra ndi'i va vino, ra saa ndika'an si'í Jesús xi'in ra kachi ña saa: —Köö ka vino ko'o na —kachi ña. Ra saa ndika'an ña xi'in na chu'un nda'a kan, kachi ña saa: —Na sa ndo takundi'i ña ^ka'an ra xi'in ndo —kachi ña xi'in na.



Ra saa ndika'an Jesús xi'in na chu'un nda'a
kan kachi ra saa: —Sakutu ndo iñu saa
kisi yo'o xi'in tiakuii —kachi ra. Ra saa
sakutu ndáá na kisi kan xi'in tiakuii.



Ra te ndi'i saa ndika'an ra xi'in na kachi
ra saa: —Tava ndo lo'o rá, taxi ndo nda'a
ra ndiso chiñu tava viko —kachi ra xi'in
na. Ra saa tava na rá taxi na nda'a ra
ndiso chiñu tava viko kan.



Ra te ixtondoso ra tiakuii ra nduu vino kan, ra nii ndikundäa ini ra ndia mii ke kee ra, ndi su na chu'un nda'a ra xa kundaa va ini na kan, saa chi mii na kan kuvi na taan va tiakuii ini kisi kan. Ra saa ndakana ra ndíso chiñu ndatava viko kan mii ra tanda'a kan, ra ndika'an ra xi'in ra kachi ra saa: . . .



... —Takundi'i yuvi ra xi'na ka va vino ra vá'a, kuvi
ra taxi na xi'i yuvi na xa'an viko, ra te xa ndi'i ra
kan xi'i na, ra saa vi ke
tava na vino ra nuu. Ndi
su yo'o, ra nduvi ni va xa
kun saa chi chuva'a va
kun vino ra va'a, ra ndia
vichin vi ndatava kun
ra —kachi ra
ndiso chiñu
ndatava viko
kan xi'in ra
tanda'a kan.




Ña yo'o ku ña xitu'un ña nuu
va'a xa Jesús ñuu Caná, ña
ndikun ndiaa chi Galilea, ña
ndaña'a ra ndiee ña iyoo
xi'in ra, saa ra kandixa va
ndia ita'an xi'in ra ra.



Ra te ndixaa Jesús ve'e ra Pedro, ra
saa xini ra ña ndiee ka vi ndo'o ña siso
ra Pedro kan kandu'u ña nuu ixto xi'in
ka'ni, ra iin ndiakua ndatuvi ña xi'in ña.



Saa nditiandiaa nda'a Jesús ña, ra ndikun
nduva'a va ña, chi kee va ka'ni kan, saa ra
ndakoo ña, ra xa'a ña ^xavii ña kuxi va ndia.




Ra te xa kuaa ndikita ñu'ù kii kan, saa ndixaa na yuvi xi'in takundi'i na xi'i, xi'in na tiin tachi ndiva'a nuu Jesús. Ra iin ndakutu ndaa nuu ke'e ve'e nuu iin Jesús xi'in takundi'i na ñuu kan.



Ra sanda'a Jesús kua'a ni na xi'i, na ndo'o ndia ndia ka mii nuu kue'e va. Ra sanduva'a tu ra kua'a ni na tiin tachi ndiva'a va. Ra nditäxi ra ña na ka'an ña xi'in ra, chin tachi ndiva'a kan, ra xini va ña ra, ña kuu ra Se'e Ndioxi.



Ra takundi'i na xi'i, ra kuni na ña tiandiaa nda'a na
Jesús, chi kundaa ini na ña ku mii ra ndiee ña sanda'a
ra na, ra nduva'a ndi'i va na xi'i xa ra.



Saa kasoko kumi tiaa iin ra nduchi'ña kuvita nda'a,
kuvita xa'a, küvi kaka, ra kandu'u ra nuu ixto ndixaa
ra xi'in ndia nuu Jesús.



Su ndi ndiküvi tiandiaa na xi'in ra
ndia nuu íin Jesús, chi iin chitu ndaa
yuvi, saa ra ndaa na chi xini ve'e
nuu íin Jesús, ra kaan na
iin yavi, ra yavi kan sanuu
na ixto ra küvi
kaka kan.



Saa te xini Jesús ña ndinuni ni kandixa na yuvi kan
ña iyoo ndiee ra ña kuvi
sanda'a ra, ra nduchi'ña
kan, ra saa ndika'an ra
xi'in ra nduchi'ña
kan kachi ra saa:
—Se'e, xa xaka'nu
va ini yu xa'a kuachi
kun —kachi Jesús
xi'in ra.

—Yo'o ku ra ka'an yu
xi'in: ndakoo, ra
ndaki'in ixto kun, ra
kuanu'u ve'e kun
—kachi Jesús xi'in ra.



Saa nandaa Jesús ini
barca kan xi'in ndia
ita'an xi'in ra, ra
ndaki'in ndia kua'an
va ndia.



Ra sakan saa kuu ndia kua'an va ndia, saa ra tu'va
ndiee ka vi xa'a xika tachi kui'na nuu
tiañu'u kan, ra iin ndakundichi
ndakundichi nuu ra xa ña, ra
xa'a iin kuni ndakava
barca kan xi'in ndia ka'a
tiañu'u kan, ndi su Jesús ra
yaa yaa ndisa'vi ini ra
kandu'u ra kixi va ra.



Saa ndika'an ra xi'in ndia kachi ra saa: —¿Nichuun ndiee ni iyu'vi ndo? ¿Ra nichuun lo'o ni ndiaa ini ndo yu'u? —kachi ra xi'in ndia. Ra saa ndakoo ra, ra ndika'an ra xi'in tachi ra ndika'an tu ra xi'in tiakuii va, saa ra ndikun xikoyaa va ña, saa ra iin kuu taxin va.

Saa ra ndakanda ka vi ini ndia, ra kachi ndia saa xa'a Jesús: —¿Ni tiaa kuvi ra yo'o, ra

ndia tachi xi'in tiañu'u yo'o ra kandixa va ra ña ka'an ra? —kachi ndia.



'Saa chi ku'vi ni ini Ndioxi xini ra na
yuuvi yo'o, ña kan ke ti'vi ra se'e ra,
ra mitu'un nuu ra ña kixi ra ndixi'i
ra xa'a na, ra takundi'i na kandixa
ña'a, ra ndoñü'u na, chi ni'i va na
ña kutiaku na xi'in ra ndia
ndikaa ndiku'un.



Romanos 3:23

Ra na kundaa ini ndo, chi na iyoo kuachi kuvi takundi'i va yuvi, ra xika ni va iyoo na nuu Ndioxi, ra koo mii ña va'a ra, kuu mii vi na.

Romanos 6:23

Saa chi yuvi na ^xa kuachi, ra ña cha'vi kuachi kan na ke kuvi va na, ndi su Ndioxi, ra ña sani'i tu ra kan yoo ke kutiaku yo xi'in ra ndia ndikaa ndiku'un va, xa'a ña xa nduu yo iin xi'in Cristo Jesús, ra kuu Tata yo.



Hebreos 9:27

Ra ta ku'va kuu xi'in Tata yo Jesucristo kuvi tu ña ^kuu xi'in takundi'i yuvi va, saa chi indaa ichi va kuvi ña xiniñu'u kuvi na, ndia saa ra ndiatu na ña sayukun Tata yo Ndioxi kuachi xi'in na kii ña vaxi va.

Efesios 2:8,9

Ra xi'in ña yo'o ke kundaa kaxi ini yo, ña ndikaku yo xa'a ña nda'vi ni ini Ndioxi va, xa'a ña ndakundiaa ini yo Jesucristo. Ra ndia nii chiñu ndixa yo xa'a ña, chi mii va Ndioxi kuvi ra sani'i ña yoo. Ra süvi xa'a ña ndixa yo iin chiñu va'a kuvi ña ndikaku yo. Ra xa'a ña kan ke ndia nii yuvi küvi kutiaa ni ini xa'a ña ndikaku na.



Romanos 10:9,10

Tu na ndakuiin kun xi'in yu'u kun ña kuu Jesús ra xa'ndia chiñu nuu kun, ra kandixa kun xi'in ndinuni nima kun ña sandatiaku va Ndioxi ra nuu ña ndii, saa ra kaku va kun. Saa chi xi'in ndinuni nima va yuvi ke xiniñu'u kandixa na Ndioxi, ra saa ke ndaki'in mani ra na, ña nduu na ta ku'va iyoo yuvi na koo kuachi nuu ra; ra xi'in yu'u na ke ndakuiin na xa'a Jesucristo ña va'a na kaku va na.

San Juan 3:16,17

'Saa chi ku'vi ni ini Ndioxi xini ra na yuuvi yo'o, ña kan ke ti'vi ra se'e ra, ra mitu'un nuu ra ña kixi ra ndixi'i ra xa'a na, ra takundi'i na kandixa ña'a, ra ndoñü'u na, chi ni'i va na ña kutiaku na xi'in ra ndia ndikaa ndiku'un. Ra nditi'vi Ndioxi se'e ra ña kixi ra ña ka'an ra ña na ndo'o na yuuvi yo'o xa'a kuachi na, chi xa'a ña sakaku va ra na ke kixi ra.



1 San Juan 5:11-13

Ra ña ^ndakani Tata yo Ndioxi nuu yo, ra xa'a ña taxi ra ña kutiaku yo ndia ndikaa ndiku'un va kuvi ña, ra ña kuvi ndani'i yo ña kutiaku yo kan, ra xa'a ña xa Tata yo Jesucristo, ra kuu se'e va ra kuvi ña. Ra xa'a ña kan ke yuvi na ita'an xi'in se'e Tata yo Ndioxi, ra ni'i va na kan ña kutiaku na ndia ndikaa ndiku'un; ndi su yuvi na kuëe ita'an xi'in se'e ra, ra ni'i vi na kan ña kutiaku na ndia ndikaa ndiku'un. Ra tutu yo'o kuvi ña tiaa yu ña kuxaa ña nuu ndo'o na ñani yo, na xa kandixa ña kuu Tata yo Jesucristo se'e Tata yo Ndioxi, ña va'a na kundaa kaxi ini ndo ña ni'i va ndo ña kutiaku ndo ndia ndikaa ndiku'un.



San Mateo 8-9; San Marcos 1-2, 4;
San Lucas 4, 8; San Juan 2

Storyline by: Edward D. Hughes

Illustrated by: Byron Unger, Lazarus,
and Alastair Paterson

Adapted by: E. Frischbutter, Sarah S.

Metlatónoc Mixtec NT (mxv) © 2017, Wycliffe Bible
Translators, Inc. All rights reserved

<https://live.bible.is/bible/MXVWBT/MAT/1>

©2025 Bible for Children, Inc.

www.M1914.org

www.bibleforchildren.org

